

四庫全書

經部

欽定四庫全書

易像鈔卷十一

明 胡居仁 撰



陸子曰但懲忿室慾未是學問事便懲室得全无也未
是學學者須是明理然後說得懲室知學問懲室與
常人懲室不同然則損大象徑言懲室未有備乎曰
卦名損便都是學問況五言或益之十朋之龜弗克
違此非天下之至明不與也

損有時民猶說也損無時澤將竭矣然則下體兌中爻
坤此水始涸時損有時也上體艮為冬春之交二前
震為春此而損澤竭矣故聖人嚴之以弗損

損初曰已事朱子曰天下甚麼事不關自家身已極而
至於參天地贊化育都只是自家分內事自出震到
說兌以兌說合艮成故損初便能認得為已如此

天地男女絪縕構精之義聖人不以釋水火風雷之交
而以釋山澤之交又不以釋成而以釋損是為聖筆

化工之合

天地不絀絀无非戾氣男女不構精无非死氣泰正交
咸正感以全體論損之絀絀構精男外女內以女為
主似非正感故單以主父論而謂之一人行

三人行則損一人大凡對人言說也只好一箇開口兩
人齊說已難而況於三損三人以說上行初酌損二
弗損三竟謂之損義可知矣一人行則得其友又全
藉有上在上與三合志止之於五上故特稱友

闕

聖人過涉滅頂損一人此皆未可襲跡而為之者
三人行則損一人以下二人陽剛之說為主而聽四五
兩爻為之從一人行則得其友以上一人陽剛之止
為主而已為之從所謂致一之義固如此一主也致
一得所主也陰以陽為主女以男為主地以天為主
俱致一之道

記曰龜以為畜故人情不失損六五益六二曰十朋之
龜損初九曰酌損皆龜以為畜之義

或曰三人行則損一人損三為上也一人行指上也則得其友五得上為友也乃三上行而為上却不見上之下而為三又不見上之下而為三在損卦中幹甚勾當世間有此奇詭事

損之初曰遄往四曰使遄初說而上行四止而下受初剛而四柔也益之上曰莫益三曰凶事三任益上任凶上剛而三柔耳又可見自下受之雨露霜雪无非教自上施之當為雨露无為霜雪子曰莫之與則傷

之者至損下弗損枉已未有能直人无害其為下益上莫益財聚未有不民散深害其為上此上下損益之辨也為人上者可以鑒矣

損者損其有餘益者益其不足自卦象言之艮一陽二陰則陽不足兌二陽一陰則陽有餘故損下益上其道上行震一陽二陰則下不足矣巽一陰二陽則上有餘矣故損上益下民說无疆可見卦之名義皆實

象

章本
清

序以泰否居首雜以損益代之懲忿窒慾遷善改過立
人道之大端也人匪麗无明山澤風雷合而坤虛全
體成麗於其中是為天下之至明故皆象以十朋之
龜人无天下之至明欲有事於懲窒遷改俱不可得
為上宜安止无為而以說下為元龜為下宜震動力作
而以巽上為元龜

少男少女以男下女則咸反則損說女情慾易動不可
以為主也長男長女男外女內則恒反亦益震男奮

勵有為內外惟其所有事也

損益皆言十朋之龜范忠宣公奏議朋龜效靈庶職修
舉朝廷獲多士之助近臣免尸素之譏朋龜獻兆庶
績咸熙堯舜三代之治可不勞而成今按損五以上
之止靜克受下之讜議益其光明篤實為朋龜益二
以下之震動克受上之風勵益其恐懼修省為朋龜



吉事凶事皆為益故曰雨露霜雪无非教進此而益之

能事方備故曰告公用圭聖人所謂吉凶生大業吉
凶與民同患之義全如此張氏采曰物不受變則材
不成人不涉難則智不明故隕霜不殺者物之災也
逸樂終身者非人之福也呂東萊曰天地之造化必
有大凋落然後有大發生有大摧折然後有大成就
損上无家一志在君似與三不可互為家以山澤分形
難於轉徙益四遷國一志在民似與初可以互為國
以雷風一氣有可變動

泰否所以體乾坤之全損益所以用坎離之中損益存於家人睽蹇解之後損蹇睽下體之合益家人解上體之合皆合以用坎離之中者朋龜以十象坎一離九之合亦十也

家語夫享所以昭德也不昭不如其已二簋用享損益以儉德昭天下耳

損其疾使遄有喜蘇氏曰遄者初九也下之所損有限而上之求益无已此下之所病也我去是病則夫遄

者喜我矣自初言之已事過往則四之求我也寡故酌損之自四言之損其疾則初之從我也易故過有喜

蠱剛上而柔下咸柔上而剛下恒剛上而柔下以是例之損之為卦艮剛上兌柔下損下益上其為損柔益剛无疑乃象又言損剛益柔有時何居曰益損上益下矣為下者單受上益一无所報夫豈成其為下乎損損下益上矣為上者單受下益一无所報又豈成

其為上乎益之二曰或益之十朋之龜弗克違永貞
吉王用享於帝吉此下受上益而為享上之報者也
損之五固益之二也其為朋龜之益同則其為享下
之心亦同益言於爻曰王用享於帝自民庶以至於
為王由上帝視之王亦下也王特下民之為首者耳
天生民立之王王為天下之歸往寵異之惟上帝帝
天之命主於民心天視自我民視天聽自我民聽畏
下民所以畏上帝益下民所以事上帝能為王者能

享帝故曰王用享於帝吉損言於彖曰曷之用二簋
可用享損而有孚至於元吉无咎可貞利有攸往損
下益上損柔益剛之道備矣盡矣上剛亦何之而非
是道為用乎二簋可用享以下言之玉帛可萬國筐
篚可九州水陸之輓可車可航以上言之一壺一餐
皆可養士瓠葉兔首皆可禮賢尺布斗粟皆可仁親
以下言之壤有則賦有成共惟正此不論時故无時
以上言之隨民之豐歉為補助且下益上者萬會為

一少而為多上益下者一散為萬多而為少大損大益中損中益下損下益其出之也或鉅萬其及之也惟升斗蓋有二簋而上下之志无不應矣亦惟儉損之時則有之豐登不必然故曰二簋應有時損剛益柔有時在益則无時不直截是益故曰凡益之道與時偕行在損則上下有時交相損益故曰損益盈虛與時偕行享帝惟王上益下下享上上不居惠本之帝王不抗帝夷之民民不瀆分首之王二簋用享曰

曷之下益上上享下匹夫匹婦皆勝予民視民聽皆
明威天下合以益一人一人何以益天下民財易匱
何以生之而不傷民力易竭何以節之而不困民事
有一毫不迫身不成享民瘼有一毫不切已不成享
身在皇堂心周部屋尊居密勿慮竟四海摠无非一
腔篤實真懇心為之潛注默輸於无外而貽民泰山
四維之安茲之為享也原不在多儀故曰二簋曾无
之非是故曰曷之也

上益下上總不居功夫何以受下之報而所以事上帝之事所當盡故益二曰王用享於帝吉下益上上何可无報何可不成享當无之而非愛養樽節對答天下誠心實念之流注故損象曰曷之用二簋可用享咸取女恒制義以艮震主兌巽乾道損上行益下下以兌巽承艮震坤道

謂之雷風便象順布便象平寧常久世界雷聲動而外出時出而出無暴風氣巽而內入時入而入无疾為

恒謂之風雷便象逆布便象轟烈震蕩世界撓萬物
莫疾乎風風飛自天主施動萬物莫疾乎雷雷奮出
地主生為益至於澤山為咸亦順布山澤為損亦逆
布山主有澤澤自上零惟山有受惟澤亦聚曰咸山
下有澤澤從下瀉山不克受澤亦易消曰損皆實象
亦實義

上之益下只須樹一個風聲以鼓動城中下之益上凡
財力都屬膏脂須是實輸以灌注乎上又且每如土

壤之於泰山下為錙銖之畫上為泥沙之視故益下
非其无損而止言益益上亦有弗損而特言損

損初曰已事山之為止自如而澤之為潤无已事固其
心益上曰恒心雷或有時收聲而風无時息吹心亦
其事十朋之龜龜者洛書即後天一圖奇偶俱朋為
十而坤十全體具於損益中離一陰麗於二陽中為
龜損益三陰麗於三陽中豈非天下之元龜龜象一
損柔說上行剛止要終而二剛朋之以原始通體遂

成篤實之光明益柔巽下下剛動原始而二剛朋之
以要終通體遂成動變之光輝龜象二下說行上安
止一涓一滴盡決江河凡以上受下者有此其為靈
也孰如上風行下雷動萬戶千門次第洞開凡以下
受上者有此其為靈也孰知龜象三

損初已事上曰无家藹然虛受之懷故為懲為室亦非
虛不能益上勿恒初曰大作儼然方立之操故為遷
為改亦惟立乃克

損澤益山翻咸為損原不失其為咸不然亦勿用取之
女耳損風益雷翻恒為益原不失其為恒不然亦不
從一終之婦耳

為下无損必逋賦之亂民兌為毀折故而上止難安故
以二簋教用享為上无益必殖貨之暴君巽為近利
故而下震易動故以大川示利涉

損懲窒要終絕去科臼故曰无家益遷改原始不得怠
緩故曰大作

咸恒損益總為泰否之變泰之內君子上一爻於小人
上為損三上相易亦然其曰得臣无家若有終畜小
人為臣終不與小人為家之意否之外君子下一爻
於小人下為益四初相易亦然其曰利用為大作若
有為大於小又有化小為大之意損以艮要終保泰
君子已結果收成益以震原始傾否君子方從根撥
轉耳若咸則否之內小人上一爻于君子上者而類
舌之咸終无改於小人之口若恒則泰之外小人下

一爻於君子下者而始求以浚猶然小人求人心
是為君子小人之定辨

君子待小人之道如天之无不覆在泰內則包荒若憫
其饑而粒之食在否外則包桑若憫其寒而授之衣
上之於泰上為損之有孚下之於否下為益之利涉
以人惟萬物之靈欲盡人勿失其為靈是為十朋之
龜之益泰否損益之道行令凡世之為小人為民衆
既不至於凍餒有患又不至於冥頑弗靈夫是之謂

天覆之度夫是之謂君子之用心

頤有靈龜謂人无養正之吉言語有不慎飲食有不節者无之損益有十朋之龜謂人有不克懲窒不克遷改者无之

艮止也止則終以止為終終而无始豈曰天行故凡艮居上卦下合乾亨為天衢下合震涉為大川下合坎利禦寇下兼山敦艮吉皆四剛卦之為盪也至於下合坤為剝之碩果下合巽為蠱之高尚下合離成賁

白下合兌无損家皆四柔卦之為盪也而剝蠱損相
盪尤至剝變也柔變剛也以坤柔變艮剛由變而上
果方碩如无剝但華不果雖果貌乎其小者耳蠱者
事也蠱則飭也穀積久變為飛蠱蠱亦變也巽柔
蠱艮剛由蠱而上事方无以尚方仍其高如无蠱絕
頂之外遂无進步雖高而危抑有尚者耳損減也傷
也貶也虧失也以兌柔損艮剛由損而上原弗損原
為益之如无損莫為臣獨夫耳家於高危立崩之道

政不如其无耳剝碩肌膚脫落盡惟有精華在隆寒窮陰常包一線之陽和蠱尚多病道心生多病於人未足憂狂風疾飈愈鞏四維之磐石至於損无家惟正共於萬邦富原藏之四海天下莫非其臣崇高一无所有剝碩不顯蠱尚亦泯如是而後為天下一家之能事象故明之曰大得志

三人行則損一人三樣損法初與二陽剛有餘酌損之如酌盈濟虛之酌隨盈虛以為權量弗損益之三年

有一年之餘九年有三年之餘曾弗自損其有但益之以所餘三陰柔不足有如益在其上必定損其在三故曰損一人一人行則得其友三損下益上主爻也同志為友相佐佑為友善兄弟為友三行與上易地為友初與四有同志乎有不有无相為佐佑乎二與五有同志乎有不有无相為佐佑乎分嚴上下情藹兄弟名為下損上益誼如朋友佐佑三人合為一人上下并无二心以下說要上止真是一團和

氣布護於兩間一團說意流行充塞於宇宙胥自六
三一人行得之故繫傳極言絪縕構精之化

損初二如富民三如貧民富民終事好義易貧民終事
好義難富民共輸累千百非損貧民供輸纔升斗亦
損然亦損所當損一以說道行之略起貧富二見使
是疑便說非其說故曰三則疑這一點說行意思自
少發生要之艮成而止在咸男以止下女在損女以
道說男故曰致一咸曰天地感而萬物化生聖人感

人心而天下和平損曰天地絪縕萬物化醇男女構精萬物化生俱此

陰陽惟一氣為升降上升即陽下降即陰兌象陰降之始至巽而下伏震象陽升之始至艮而上止此升降大義震原始艮要終陽生陰陰從陽此陰陽定分咸之情艮下宜上兌上宜下此交感而相與者也損則艮上適得要終之位不下兌以降陰居下或不上行以益艮窮矣惟上行然後通故不曰情而曰道上行

恒之情雷動外出風巽內入此對待而方立者也益則震下適得原始之位不上巽以伏陰居上或不下下以益震窮矣惟下下然後光故亦不曰情而曰道大光

以一卦陽饒陰乏論損下乏上饒損下益上也益上乏下饒損上益下也合二卦陰陽饒乏論損秋冬之交拏斂之時全體是損益春夏之交發生之時全體是益不止損下為損而益下為益人無損忿不懲慾不

室如當秋冬而无摯歛浮芥耳已人无益見善不遷
有過不改如當春夏而无發生死梗耳已

損以遠害人无損豈惟害人終必害已益以興利人有
益豈惟利已亦必利人

易筌損損三以益上者也而五受其益故曰自上祐益
損四以益初者也而二受其益故曰自外來孔子讀
易至損益喟然而歎子夏避席而問答曰夫自損者
益自益者缺吾是以歎也又淮南子引孔子讀易至

損益喟然而嘆曰或欲利之適足以害之或欲害之適足以利之利害禍福之門不可不察



夬揚於王庭范氏以為內皆君子此賞罰明行之時

鳩音決

一名巧婦柔乘五剛巧佞莫甚

易筌居德則忌言不居其德也

夬揚於王庭朱子與臺端書伐木而翦其枝葉不若斧其根壅水而捍其波流不若塞其源鳴金鼓耀戈甲

而噪呼以逐虎不若乘其方睡而斃之之速蓋此等
小人有生以來自朝至暮无非罪惡不可殫數且又
人主素以倡優奴僕畜之初不責其名檢而間者議
臣乃復挾摘苛細而一一以陳之其不納則宜矣唯
其日侍燕閒逢迎縱臾使人主之心恬於逸欲而法
家拂士之言不得以進狃於卑近而正大久遠之計
不得以聞賄賂公行奸邪堵立凡所以為天下國家
之紀綱者日傾月壞而上下相蒙莫敢以告是則此

一二人之罪所以上通於天而深為今日膏肓之病者執事誠能深此為罪揚於王庭深贊聖王去邪勿疑之志又引同類之賢合謀并力以決去之則天下膏肓之病庶幾可去矣此書允可為揚於王庭註䟽決初壯於前趾往不勝為咎范忠宣公曰大輅與柴車較逐鸞鳳與鴟梟爭食連城與瓦礫相觸君子與小人鬪力不惟不能勝兼亦不可勝不惟不可勝雖勝亦非也韓魏公曰君子不勝則奉身而退樂道无悶

小人不勝則交結黨煽千岐萬輒必勝而後已小人復勝必肆毒於善良无所不為求天下无亂不可得已

夬君子決小人之卦書契之作蓋取諸夬亦所以決去小人之偽而防其欺也

往不勝或曰勝謂勝其任惟三五夬夬夬便是能勝夬任之象三夬夬以五先之五夬夬以三後之

澤以說萬物水以潤萬物說與潤何以異凡火必燥凡

水必潤常也曰膏澤曰福澤曰恩澤則若出於非常而物為說之矣故澤非異於水而說不止於潤又澤有二義上天下地之澤此地之瀦水也澤上於天之澤則天之露澤與雨澤矣

噬上何校滅耳曰聰不明夬四聞言不信亦曰聰不明聰而明始乎坎終乎離坎化成離是為耳順是為固聰明達天德而稱睿知之至聖

否三包羞夬上无號此乃小人最毒最狠情狀

易中兩言聰不明即既未濟鬼方之義象人只自聰已極而不求其所以明便如離日中天而反蔽之以黑雲南國文明而反淪入為幽都故以鬼方象也

子夏傳菟陸草根草莖剛下柔上本草菟有陸種皆屬陰或曰菟草昌陽也

耳兼目聞兼見聰兼明明從聰出聰以明顯故聖人於離特曰聖人南面而聽天下嚮明而治又於噬嗑上

夬四特有聰不明之戒

六根互用於此可參

四牽羊悔亡三為應上夬夬之爻四居三前才力不逮三宜安出三後以讓三之進夬為當而四非其人古今亦鮮見其人此聰明所以為絕德聖賢所以為絕學或曰牽者牽連而進四隨九五以進為牽

周氏曰易於君子之合每致意焉人情於始交未有不固者也逮積安成䟽耦俱生軋甘陵蜀洛之釁每動於羣賢極盛之時夬戒軋也故曰孚戒䟽也故曰惕總之曰號易所謂號類詩所以怨呼而懼靡應也故

用號疾呼而猶患弗聞也故類怨怨者慕君憂國至誠懇惻之極思號者意召聲求同寅協恭之要術天下同室也君臣僚友之屬同舟也誠以壓溺之禍非一手足所能為而衆亦均有責耳有孚號則天下之人羣合而國事濟矣



乾巽相遇小畜稱妻稱婦姤乃勿取畜巽志在於應乾姤巽志在於消乾畜巽在外卦乾為主姤乾在外卦

巽為主也應君子之小人小人不為主與之配合无不可長消君子之小人小人為主與之比附不為所啗不已一失脚為千古恨如此

闔戶謂之坤復則闢闢戶謂之乾姤則闔

姤女壯勿用取女劉行簡曰天下之治衆君子成之而不足一小人敗之而有餘李常寧曰天下至大宗社至重百年成之而不足一日壞之而有餘邵子西晉吟有刀難剖公閭腹无木可梟元海頭禍在夕陽亭

一語上東門嘯浪悠悠晉史賈充納女以壬辰劉曜陷長安以丙子相去纔四十五年宋史賈妃之冊以壬辰而禍亦以丙子遂與西晉同轍姦臣孽女之敗國家固如此

鼎二妾初大過之二妻初妬曰勿用取女二於初不但妻亦不妾井二鮒初曰射鮒微而土潛相附旅行不啻宵小之類射亦止於浥注之而已妬二魚初曰包魚為林林之生包更具有天度此井二妬二合坎

合乾分量大小之別

剥上碩果反為不遠之復。夬上无號反為羸豕之孚。君子无故而去有時乎。復仍有引過自咎之心。小人有故而去有時乎。姤无非報復毒螫之意。君子小人所存之不同固如此。

否初曰貞吉。亨。姤初曰貞吉。從根上撥轉。

姤爻取象曰魚曰瓜。最有趣味。最可警省。魚爛瓜潰皆始自內而外。初不覺也。

韓魏公謂小人不可求遠三家村中亦有一家當求處
之之道知其為小人處之而已更不可校如校之則
自小矣人有非毀但當反己是不是已是則是在我
而罪在彼焉用計其何如妬之包有魚處之之道也
包无魚遠之之道也



澤上于地萃君子以除戎器戒不虞大抵人三為衆自
三人以上便當有不虞之戒

用大牲吉利有攸往祭統祭者澤之大者也是故上有
大澤則惠必及下顧上先下後耳非上積重而下有
凍餒之民也是故上有大澤則民夫人待於下流知
惠之將至也由餒見之矣故曰可以觀政矣



萃升假廟用禴困亨祀祭祀觀盥皆以巽兌象震陽巽
兌陰震明巽兌幽精意巽說於幽陰而无不孚其孚
至矣陽明不假言已

冥升與虛邑一心一義

冥升在上消不富是論南征大人用世事業至上也定須知退知亡知喪而知其為富貴功名也者

萃初若號號四以順升上冥升與三俱冥三或以明入上必以暗出使升二有南征之吉而更有冥飛之舉其貞為何如其利為何如牛僧虔注之不已則溢畜之不已則慄馳之不已則躓引之不已則逸

冥豫冥升皆不可无以變其窮冥豫動體聖人教以渝

无咎冥升順體聖人教以消貞各因其固有

臨曰消不义升曰消不富姤言隕履言夬不論乾坤凡遇兌巽為内卦皆消體時消與消以消為用盛德大業便在此世人喜息惡消然卒不免於消其如消息之天行何



困上有口不掩言之象故曰尚口乃窮

雷水為解則澤水為困可知震為東方為明旦明有禮

樂故解五曰君子有解兌為西方為幽夜幽有鬼神
故困五曰利用祭祀又山水為蒙有止窒不流之意
故以亨行澤水為困有挈斂不舒之意故貞大人吉
朱彥修治一男子小便不通他醫治以利藥益甚彥修
曰此積痰病也積痰在肺肺為上焦膀胱為下焦上
焦閉則下焦塞譬如滴水之器必上竅通而後下竅
之水出焉乃以方大吐之吐已病如失此通於困卦
消息者

君子以致命遂志陳氏曰志由已者也志回則禮從釋之志端則禮從節之志純摯則竭情歸質而自致於天自致於天也者天之所不得違也聖人所不得制也教之所不束也文之所不得傳也或閨閣而進於君子或章逢而非夫或荏苒而能遂或軒然自雄而易奪聖人之取舍宜何如哉

雷水為解為春夏為陽氣發生之時令澤水為困為秋冬為陰凝寒沍之時令

困五乃徐有說渙四匪夷所思不以小人之困可獨置而忍一物失所不以小人之思可獨忽而棄窮蹇弗詢此困五所以為中直渙四所以為光大

困二征凶无咎與大過上凶无咎同義既利用亨祀幽可質鬼神即有人非原无愧雖征行於凶禍之途夫何遇咎之有

險以說不怨天盡所以對天不尤人盡所以宜人此便是利用亨祀利用祭祀之道

困卦爻言大人言君子言亨祀言祭祀大人君子總以
林總蒼生陷溺失所起念匹夫匹婦納溝為恥而曾
不以一身一家之困窮為困窮

紱蔽膝上古衣蔽前而已紱猶象之困二朱紱方來言
可向明征進義五曰困於赤紱從二視五為朱為方
來從五自視猶赤猶困未能來二赤兌本色以天子
朱諸侯赤為辨乃另義



困塞井通困上爻為兌止有外塞坎水之流之象井初爻為巽入有內通坎水之源之象

无喪无得往來井井但有喪有得往井未必來井來井未必往井

困到利祭祀方是相遇井到寒泉食方是通

改邑不改井不得以坎為井巽為邑如是則上井下邑義不相屬卦象通六爻為井通六爻為邑下體巽坤居之上體坎進居坤全象俱穿坤土而成故曰改邑

初泥二谷三滌四甃異進既為中爻之兌兌又進居
上坎之下一改而異風皆澤水再改而止水皆流水
纔常滌而无泥常新而无舊常甃而无敝漏亦皆改
義乃五之剛中之泉原隨地皆有隨取皆足初何待
改夫是之謂改邑不改井

井改邑徹內徹下徹始革改命徹外徹上徹終淮南子
八方風至浚井取新泉四時皆服之管子杼井易水
此改邑之井水也論語鑽燧改火此改命之革火也

訟二其邑人比五邑人不誠泰上有邑告命謙上征邑
國无妄三邑人之災晉上維用伐邑夬彖告自邑升
三升虛邑井彖改邑邑象八卦俱取升虛邑井改邑
皆巽巽為風風以神用旋轉八方運於无形巽德之
制巽稱而隱巽以行權虛與改巽德之所尤備也

井谷射鮒象曰无與非謂二五皆剛兩剛相敵則不相
與如艮之上下敵應不相與若然五井何以列五井
之列以二剛之巽也五二原是合德之與二无與政

謂谷而射鮒則將不能成五之冽无與其為五耳巽
水之主在初上水之主唯五二與五以剛合德為井
泉宜上巽不宜下射谷戒詞二何以谷凡易之情近
而不相得則凶或害之悔且吝二初近爻也二以巽
水主初而委已從初谷矣小魚相附旅行為鮒二初
相附以巽射注惟鮒而已矣二四同功二谷則四甃
不成甃亦不免敝且漏矣如是何以巽五而成冽故
曰无與戒二不得為谷主乎初而不主初宜以剛直

遂上巽之義若困四曰有與有二為與剝二曰未有與未有上為與俱與井二相發

乾乾謙謙坎坎蹇蹇夬夬皆言於爻惟井井言於彖井井係之來往往井以上水言來井以巽水言有往无來井體不立有来无往井用不行

舊井无禽橫渠先生嘗言義理有疑即濯去舊見以來新意朱子曰此說甚當竊有理若不濯去舊見何處得新意來今學者有二種病一是主自家意思一是

舊有先入之說雖欲擺脫亦被他來相尋

井汙至踐阼篇武王井銘原泉滑滑連旱則絕取事有
常賦飲有節井上六勿幕有孚則當不至汙而絕矣
故元吉

雷水解風水渙有出幽谷遷喬木之象解上射隼高墉
之上血去惕出義可知矣水雷屯水風井有下喬木
入幽谷之象屯初盤桓井初不食義可知矣

井初雖巽水之主受從二視之鮒耳二如昵初何以上

五而為天下食抱朴子螭螟屯蚊眉之中而笑彌天
之大鵬寸鮒游轍迹之中不貴橫海之巨鱗

困利用祭祀曰受福井求王明曰受福欲通幽明之故
者於此考之凡人困不利祭祀是為窮困井不求王
明終為泥井

王明並受其福孟子曰守約而施博者善道也曰有是
四端而自謂不能自賊者也謂其君不能賊其君者
也曰惟大人為能格君心之非君仁莫不仁君義莫

不義君正莫不正井三之渫委可用汲然何能以一
人之渫遍及天下而使人无不汲但巽王而進之明
使能以一人之渫及天下以一人之養養天下井是
居其所底居其所便若人有分邑而不相通王家天
下人中國无分邑故須改邑可用汲在三明在五五
汲其渫以為天下養非三之渫而皆五之渫非王之
渫而皆天下之人之渫人无不食之惻人成可汲之
用三惟居其所五亦惟恭已南面而天下井井同風

故曰竝受其福也

改邑不改井時乘六龍以御天雲行雨施天下平此聖人隨時平治天下之雲雨井德之地井居其所而遷此君子隨地養民之原水井下體巽巽入也巽風也風有八方所入各巽巽水上水以成井惟一君子所入所居如風不同方而井養之德惟一境改而心无改地異而心无異此身到處一泓寒泉可為人汲養而不窮皆君子改邑不改井之德

天生賢人君子原以利天下福蒼生不使其自為有餘
故其為道非行即明非明即行明即其行行即其明
不明即為不行不行即為不明行者行其道以利天
下以福蒼生明者明其道以利天下以福蒼生明行
雖无兩項窮達各有地頭達是行底地頭窮是明底
地頭有如窮而不明又安望其達而能行故困初以
入幽谷為戒而井三以求王明為受福王者天下之
歸往王明天下歸往之明中天日月照臨之明不然

井蛙之見僅為坐井觀天之明與困初之入幽谷
何以異

澤无水困天无雨湏是澤有水賢人君子道足以濟天
下潤蒼生奚啻澤之為水澤无水國无仁賢便都是
乾涸亢旱世界了普天率上於何潤澤故為困匪以
君子一身之窮為困也

君子處困雖徹底須是明湏是覲朱紱赤紱行不在上
明自在下半或為暗世界下半自為明世界利用

亨祀利用祭祀明或无禮樂幽自有鬼神此所以為
君子之亨大人之貞

言井兼言邑井是民居相生相養之所故曰井邑又曰
廬井改邑又有貴賤有小大无以小害大无以賤害
貴

井改邑所入之途異不改井所至之域同无喪原未分
我所有无得殊不自以為功往井惟人所汲来井无
時不甃汙至亦未繙井極深不以責人羸其鉞凶失

仍歸已

六十四德皆在身井居其所若不象隨身之物不知身之遷徙轉移靡定到處為邑到處有井邑在井在邑有改井无改井若改怎成邑故曰改邑不改井



已日乃孚人到已日由甲歷戊主數既備其於南面而聽嚮明而治至理纖悉洞矚於文明朗日中是以革其可革而人无不孚

睽二女同居其志不同行革二女同居其志不相得乃
家人鼎中孚大過亦二女同居而俱反乎睽革以火
澤異性風火與風澤俱一氣耳

澤中有火革王卽曰周官四時變火以救民疾火不數
變疾必興漢禮儀志日夏至浚井改水日冬至鑽燧
改火

人到口舌好大分已屬君子易之有革只是革變那兌
口革去故另換一副口舌鼎取新重鑄一副肺腸

豺虎狼豹皆殘殺之物乾虎革虎神武不殺虎與龍同
皆可首出而為萬國主

唐裴旻善劍舞常與幽州都督孫佺北伐為奚所圍旻
舞刀立馬上矢四集皆迎刃而斷奚大驚引去後以
龍華軍使守北平北平多虎旻善射一日得虎三十
休山下有老父曰此彪也稍北有真虎使將軍射之
且敗旻不信怒馬趨之有虎出叢薄中小而猛據地
大吼旻馬辟易弓矢皆墮自是不復射乾革皆以虎

象革以變虎變豹象此命世神武之大人君子夫庸
可射而得者語曰虎豹出於山則狐狸號矣革无虎
豹之變將胥天下為狐狸而以希小人之革面无之
復先王以至日閉闕革君子以治厯明時吳晉明曰歲
十有二月三百六十日而朔虛六日氣盈五日四分
日之一而置閏三年一閏八年三閏十九年七閏氣
朔分齊謂之章四章為蔀二十蔀為紀三紀為元此
其大略也天三百六十五度四分度之一猶有些微

有餘之處

天餘六十
四秒半大

歲三百六十五日四分日之一

猶有此微不足之處

歲縮七
十五秒

而成歲差歲有差日有

閏天行之數殆難得而定矣推步之法以冬至為始

又曰歷元子正初刻冬至四百甲子而一會至甲分

齊此歷家正法也天運自然不假安排莫能違矣然

古之造歷者以鐘律以著策以測影銖銖而秤之至

石必差寸寸而度之至丈必過但知逐年推步而不

明歷數始終之運以至逐會有差二十二會以後差

四十四刻訛傳之遠日用而不知可惜也夫又曰今
之談天者類言元會運世元會運世之說不合厯法
况洪荒開闢以來未必六萬餘年史外紀盤古三皇
駕空鑿虛其不可為據明甚術數家以太乙求上古
大齊甲子與厯法近而遼廓難尋且不明厯數始終
之運余近測遠稽一準厯法以冬至日躔求周天之
轉圜以冬至晷刻求日朔之齊會若歲差若閏法一
一指掌无少滲漏間有校定本之天運考之先賢罔

敢臆說不越一歲之歷而宇宙一元之運了然目中
矣孟子曰千歲之日至可坐而得此之謂也又曰伏
義畫八卦大撓作甲子義和治歷陰陽家言其來尚
矣術家者流日用不知訛傳臆說大失作者之意余
述一二以俟識者夫渾天甲子七政以日屬虛冬至
日與天會於玄枵虛宿此歷元也降是漸差於女於
牛於斗而今在箕矣歷家謂之歲差何為其然哉曰
周天三百六十五度四分度之一而日行晝夜不及

天一度此次舍躔度所由起也日行南北陸而四時
氣候隨之約以三百六十五日四分日之一此分至
啟閉所由起也然周天之度豈能截然整齊或有奇
餘不盡之數一歲之日亦豈能截然整齊或有奇欠
不足之數郭守敬謂天餘七十五秒歲縮七十五秒
每歲差一分五十秒六十六年有奇差一度此歲差
所由起也厯法十九年為章至朔會於一時四章為
節七十六年至朔會於子時二十節為紀一千五百

二十年至朔會於甲子日子時三紀為元至朔會於
甲子歲甲子日子時一元凡四千五百六十年黃帝
八年作甲子迄嘉靖四十三年為第七十二甲子凡
四千三百餘年苟求其故厯元可攷而知也邵子元
會運世之說虛而无據余謂堯時冬至日在玄枵女
虛之交為子會漢元和冬至日在星紀斗二十一度
梁大同在斗十二度為丑會唐開元冬至日在析木
斗九度元授時厯在箕九度為寅會天垂象顯然示

人美國朝元統造大統厯以洪武十七年甲子為厯元迄今萬厯壬寅凡二百一十九年冬至日在箕四度歲差漸多厯法不可不更定也今之術家類稱開禧授時夫宋寧宗開禧厯以開禧丁卯為厯元乃第六十六甲子元郭守敬授時厯以至元辛巳為厯元乃第六十七甲子授時迄今壬寅越三百二十二年大統厯猶以為差而術者尚執開禧授時之說何居或曰海之尾閭名為焦釜之谷水入其中如沃焦釜消

乾而无復有是為澤中有火之革象又曰天地間如
洪鑪何物不消爍火在下澤在上何能有不滅者耶
鄭東卿以革為鑪亦此

歐陽文忠公曰事在天下其易差者莫如厯治厯時
毫忽微眇略不少差无時不治无時不明其於革也
為庶幾矣



巽而耳目聰明萬以忠曰惟巽乃能耳目聰明也蓋聰

明人所自有只不巽便氣高心虛自用蔽塞耳巽便有巽順虛下意思學者常體此自養便是真火候又曰木本是助火者只一巽字便成妙用今耳目聰明之士加以意氣便是以薪助火

我仇有疾四覆三革疾若在於三四而特繫之於五所以任用三四者五也不我能即慎所之之力量於是為見斯真无愧於有實之稱矣

火在內巽風自外入而然之為家人曰父父子子兄

弟弟夫夫婦婦火在外巽風自內入而然之為鼎曰
享上帝養聖賢民非水火不生活徒養其形軀而已
乎徒以自養而已乎

鼎二言我仇有疾五以柔中麗於四上兩剛之間為正
麗所重尤在上鉉匪上是麗而三四是合即有說非
所說卑踰尊小間大而聰明倒置之患聖人象之以
有疾垂萬世人君任人之烱戒旨甚明我能即二能
不為疾所即其實之堅定分量尤為可知非真有所

入而有天下之定見定守者不能

鼎折足丘靈鞠嘗詣褚淵淵不起曰比脚疾不能復起
靈鞠曰脚疾亦是大事公為一代鼎臣不可復為覆
餗

巽而耳目聰明巽水原坎一之始巽火要離九之終鼎
兼井之用也且月明外覲耳聰內藏月巽入微目化
成耳明歸於聰故鼎五惟以黃耳象聖學期耳順貴
朝聞俱此

鼎黃耳中以為實五中虛以二為實如不以二為實乃
空虛之虛耳豈成其為中乎陸子曰十虛不博一實
吾平生學問无他只是一實又曰古人皆是明實理
做實事又曰做得工夫實則所說即實事不說閒話
所指人病即實病又曰宇宙間自有實理所貴乎學
者為能明此理耳此理苟明則自有實行實事又曰
古人自得之故有其實言理則是實理言事則是實
事德則實德行則實行又曰只說近易處著著就實

无尚虛見无務高遠一是即皆是一明即皆明

噬五得黃金鼎五黃耳金鉉這金原胎於震巽二木中
又皆從烈火中鍛就彖易聖人蓋以明罰勅法正位
凝命雷電合章享上帝養聖賢示教異流竊之名九
轉金液還丹蓋以離為九以九為金為火金火色皆
赤為丹圖書七九互易故又假圖書名為還丹遂使
義文周孔之教夷為咄喜鐘呂之術惜哉

邵曰夫聖賢之所美莫美於聰明聰明之所貴莫貴

於知人知人誠智則衆材得其序而庶績之業興矣
是故堯以克明俊德為稱舜以登用二人為功湯以
扶有莘之賢為名文王以舉渭濱之叟為治由是論
之聖人之為治孰不勞聰明於求人獲安逸於任使
是為鼎五上金鉉玉鉉之義象

易像鈔卷十一

欽定四庫全書

易像鈔卷十二

明 胡居仁 撰



人心戒懼斯言笑皆中天則象故曰後有則

朱子曰陽氣發處金石亦透觀震二之億喪貝躋于九陵金石之透且不足言矣人即百行全萬善備三千三百一無滲漏而侈然自有則地位不勝凡近卑下只喚做下達只喚做入淵與喪貝躋陵之義全反此

无他只為无夜半之聲而帝不出震故

億喪貝无施伐之盡躋于九陵地位直是峻絕億喪貝
一物无有躋于九陵此身如在太虛空裡勿逐七日
得貝原故吾九陵之躋不懸空只是平地

陽明陰暗七九皆成明之用故九躋而七得用九見羣
龍无首此是陽明之極致

趙氏曰恐懼畏心也修省改過也厲患害也貝貨利也
以此思震震可知矣

震初虩虩啞啞巽初進退艮上敦兌上引此剛柔原始
要終之別

虩虩啞啞震體即說體孚剥有厲說體即震體

巽五貞要于庚震二厲躋于九陵皆通身盡為翻轉之
能事故曰吾弗能已

盖世功勞當不得一箇矜字矜即有其善之謂有其善
者兢兢然持之不啻以為无盡寶藏此正喪厥善者
耳震二億喪貝良是不有其善不有其善乃是不喪

厥善故曰勿逐七日得

初震来自来二震来来初之来五震往来震初方往震
四游来合初與四俱来如此乎其有事不止可言萬
无一失便要之萬萬而無一失故曰億无喪有事

蘇蘇蘇而又蘇震怖而死之象索索索而又索矍矍矍
而又矍絞急驚眩之象三非二之位上无五之中故
至此

震原始健行之事然須由坎厯艮到萬萬无失方喚做

有事若艮已要成終之事故艮上止曰敦巽原始順承之事然須由離歷兌庚庚有實資斧湊手方喚做有終若兌已居西成之位故兌上止曰引引止前導而敦乃為主此又艮剛兌柔之辨

震要坎艮如不喪匕鬯坎也躋于九陵艮也巽要離兌如武貞史巫三品先後庚資斧皆離與兌也

震不于其躬于其鄰正是幾先之震索索矍矍无先幾故至此或曰五上之鄰矣于卦何如曰先止思動未

入慮出皆于鄰之義若因說生憂或朝迎日夕致月
舉頭纔知天措足纔知地皆病于于躬之晚者也

聖人每言何有與无能无知聖人心體時時震初何有
可名其次則顏子亦願无伐无施盖已見善勞在已
不啻貨貝之多而歟于未之易喪矣

億无喪有事十萬曰億又萬萬曰億萬无一失已密之
極而況萬萬无失乎聖學成始成終以一敬做成朱
子謂忽然夜半一聲雷萬戶千門次第開以此

震三言青上言巽巽電發雷隨原是合章之物

震坎艮皆乾健分體而震艮又合離巽離兌皆坤順分體而巽兌又合坎觀雷電合章艮光明水澤一體風雨俱稱潤可見

震陽以動陰而陰不可以動陽故四有泥巽陰以入陽而陽非陰之所入故四曰有獲艮陽以止陰而陰不可以止陽故三有限兌陰以說陽而陽非陰之可說故三來則凶

震躋九陵以震始以艮終巽要六庚以巽始以兌終
億喪貝與商旅不行躋于九陵與后不省方勿逐七日
得與七日来復俱一脉



上下敵應不相與不消應不消相與夫是之謂各止其
所

艮其背即背是身何為又獲其身行其庭何人非已何
為又見其人艮其背通六爻言止如一身故不獲其身

行庭三人自行三人自止分六爻言止行止不同亦如一人故不見其人

三止上止止之止不必行止兼獲兩有所得是為艮其背不獲其身之象三行上止行之止不必又起人已兩見是為行其庭不見其人之象

艮背行庭人身面陽背陰面離背坎面南背北庭者宮中又為直與平艮中爻坎即背與庭之象林氏曰心中之火易然也有順吾情者輒動心而隨之以喜此是

火然而心不能止其所有逆吾情者輒動心而隨之
以怒此亦火然而心不能止其所始則旦晝牿亡終
則夜氣不存夫至於夜氣不存豈曰然之云乎而燎
原之勢殆有不可得而撲滅矣

明道先生曰人心无有所止无止則聽於物必有所止
艮其背也聽於物將所獲无非身所見无非人矣

兼山艮君子以思不出其位念菴先生曰未發之中思
之位也思有萬變而位未嘗出時止則止時行則行

常止也動亦定靜亦定常定也常止而定是天下之
至靜而非杳也亦天下之至動而非曠也吾未嘗无
作止語默往來進退而未嘗有所謂作止語默往來
進退者以撓乎其微而揺乎其精如是而作止如是
而往來進退是靜為主也非吾主乎靜也非不思
也是心官之思是无思也又曰至靜而无思者思之
位也如是而思思則得之或曰位者山之止也立于
此不遷於彼易方焉則失位矣

艮為止止乃光明徐用中曰水止故泥沙定而清者存
心止則物欲息而天理見故光明

孫聞斯曰思不出位便是艮其背的真像

周元公謂讀一部華嚴經不如看一艮卦又謂一部法
華經只消一艮卦可了元公之深于易固如此吾道
自足何事他求固如此

朱子曰心在羣妄自然退聽豈惟羣妄四肢百骸雖非
妄動有一未退聽心亦不稱在艮二艮其腓不拯其

隨其心不快象明未退聽以此

思一于理理外无思便喚做思不出其位便喚做止

卦德无偏就艮震分說動中原有止止中原有動只為

學者易偏執故震四言泥艮三言薰常示以靈丹一

粒

咸艮皆以人身取象大象於咸曰虛以受人於艮曰思
不出位此皆聖人開關啟鍵之玉匙也

良其腓趾腓聯趾便是隨了不極便亦有身可獲而心

幾於不為主安得快

艮四艮其身身伸也伸而上非已之伸而三是伸三反
上便為震時行則行行而止也象又明其止諸躬屈
而下非已之屈而三是屈三向下仍為艮時止則止
止而止也伸則行而止屈則止而止屈伸皆勿失其
止總以三為中止之主

震四之泥與艮三之限同震何泥兩震相重四居洊震
之間故有泥艮何限兩艮相重三居兼艮之間故有

限震是以陽動陰本動二陰於上而四下又有二陰
若反為下二陰所動豈成震主泥如執泥之泥務動
陰而不動於陰恐懼作於心修省見於事畧不寬鬆
毫無假借是為震四之泥有四之泥而上下四陰又
皆合初而无不來矣艮是以陽止陰本止二陰於下
而三上又有二陰若反為上二陰所止豈成止主限
如限制之限務止陰而不止於陰下二陰止於內令
其不出上二陰止於外令其不入內外既有限三又

如脊梁豎立四五分列兩邊如背肉左者列於左无混于右右者列於右无混於左左右又有列既限又列其介甚嚴為厲調劑在心為薰薰如薰風之薰大立小從心和體康自然及物而能各止其所是為艮三之限有三之限而上下四柔爻皆合上而无不敷矣

艮其輔以中正也止進于五便是中正了

厲薰心西山經浮山有草名薰麻葉而芳莖赤華而黑

實臭如麝蕪可以已厲能去惡臭令身香故古之祓
除以此草薰之因謂之薰草王逸云茵薰也葉曰蕪
根曰薰陳藏器亦云薰一名蕪草今或訓薰為熏謂
為危厲熏心不安之甚何居

彖言心唯坎爻則明夷六四以坤益九五上九以巽井
九三亦以巽旅九四以離與艮之六二九三象言思
唯艮與既濟爻則咸九四以兌渙六四以巽惟乾震
未見乾心君震恐體不假言也

卦以人身取象唯咸與艮然乾首坤腹等原合八卦為
一身如蒙躬比首小畜目噬嗑趾膚鼻耳賁趾剥足
大過頂離首大壯趾明夷股腹睽膚蹇躬解拇夬頰
姤臀草面鼎耳豐肱渙躬既未首尾等之散見種種
皆身象蓋以咸艮為例耳

艮其腓不拯其隨其心不快腓脛端一曰足肚二聯初
而止艮其腓也拯上舉又掇與援二亦止中而主在
三止於三下則上舉或非其時亦掇援不及隨如隨

風之隨趾腓相隨而止有以柔危用事而不受三限
不肯聽命於心之象其心安得為快象故曰未退聽
艮以人身為象咸相向艮相背三正如背上如後腦四
柔如後身彖傳解曰艮其止止其所允一身之主總
在心心者人之神明无方所者也既无方所如何得
止如何言止心之包絡繫于背背若心所然艮其背
便如心得所止之象也心得所止全身都是神明之
用而非形骸之用有何形骸之身之可獲艮以門闕

為象三正如庭全艮俱止三反上為震又象行三止
二初于下上止五四于上以其俱為止主象兩人三
為心絡之背時止而止即心即身即身即心既无身
之可獲三為門闕之庭時行而行即三即上即上即
三又何人之可見不獲其身都是神用而非形用不
見其人天下一家中國一人

震從下動初四為主初震二三震四震五上者乃四在
震中處二三之上假使二三得以動四又為成其為

震主遂初震方來而四震繼至泥能勿為二三所動而更有以善二三之動與初通為一震初所謂虢虢啞啞政此艮從上止上三為主上止五四者三止二初者乃三在艮中處五四之下假使五四得以止三又烏成其為止主艮其限能限二初于下使勿出亦能限五四于上使勿入孫聞斯曰內外限也陰陽限也理欲亦限也最得其旨列其寅寅背脊正中聯屬上下之大維絡列行次也位序也陳也布也上下聯

屬脉絡分明屈伸以時是之謂列既限又列強力堅持為厲調劑其心上通下暢為薰能勿為五四所止而更有以善於五四之止與上通為一止上所謂敷政此

凡人六腑不和生癰五藏不調生疽名為發背良其背无不調不和之患可知薰者草一名薜蘿上行頭目下行血海之藥良從上止以上止下單下止不上行上亢于上三鬱于中鮮有不成偏戾心疾癰疽發背

俱由此生薰上行則有以補下止之偏心得其理止
得其主自然百體各止其所故彖言艮背是无病心
爻言薰心是背底對症治未病方

艮其背諺誰人背後無人說又前點心後點背人到背
與面一般背後更無人說得更無人指點得則其人
之通體光明不待言矣艮二陽如面四陰如背二陽
主止四陰從所止徹面徹背背如其面是為艮其背
之象人惟背面有兩樣面前是一身背後又一身當

面是一身轉背又一身是以隨處有失則隨處要獲
今背面如一只有一團天理別无兩副形軀夫有失
則有獲无失又何獲是之謂不獲其身庭凡中庭明
廷大廷皆謂之廷三主止於中反艮為震時止也是
這個人時行也是這個人屋漏也是這個人行庭也
是這個人行之於家庭父子篤兄弟睦夫婦和行之
於朝廷君臣正朋友信都是一體都无人己二見是
之謂不見其人尋常人破面為不善者不足道即有

飭躬厲行者苟其背地裏有纖毫未慊亦但是艮而以言乎艮背猶千里到艮背纔是人之歸宿處故曰艮止也



漸之進或曰三主漸三止體也之謂往進猶逆必三往以逆四女四女乃為之歸故曰之進故曰女歸如是則吉

易筌居賢德善俗謂居於賢德善俗之間以漸摩而成

其學即里仁為美之意

漸朱子曰今若有人在山脚下便能一躍在山頂上何幸如之政恐不由山腳終不可以上山頂耳范忠宣公奏議道遠者理當馴致事大者不可速成人才不可以急求積弊不可以頓革道不馴致則有握苗之患事欲速成則有不達之憂人急求則才佞進而巧偽生弊頓革則人情擾而憤怒作所以景帝削七國而鼂錯受戮東漢疾橫議而黨錮大興宋襄急于求

霸以致喪師唐文宗切於除姦而訓註禍作人才以
長育而成功德以積累而大亦深得居賢德善俗之
意義

鴻漸于陸九三南陸為水落南翔之陸入于人中多患
上九北陸為冰泮北歸之陸超於天外无患或欲改
上陸作遠殊失繫易聖人精意

一陰一陽之謂道世之作聰明而不思禮卑法地者皆
夫征不復者也任才質而不思知崇效天者皆婦孕

不育者也

飲食男女人之大欲存焉玩頤卦常如泰山一座壓于雷上雷不能震飲食其有不節乎玩漸卦常如泰山一座峙于風中風不能搖夫婦其有不相保寇其有不禦乎

漸初于干干犯也初在下惟恐于在上者有干犯也故厲而言乃无咎二于磐龍未升天謂之蟠通作盤二盤旋未能高飛者故衍衍乃吉三于陸高平地也諺

平地上多吃跌故重以征不復孕不育示寇教四于
木鴻南翔乃木落時于木有惜時零落意得楠又有
為大於小辭大任小意易筌此時回翔木杪其飛漸
高或得平柯猶暫為棲息可進而不遽進為漸之最
善之象五于陵尊高在我雖易事在我人可為婦而
終不敢以夫亢天下故三歲不孕終莫之勝人惟婦
而我非夫要終何以自勝故吉上于陸終始圖難于
易三為夫有征不復之患三為婦有孕不育之患无

所適而不亂至上羽可為儀幾於夫夫婦婦正家而
天下定故吉

漸五巽體要終以順道率天下單稱婦人惟婦我不敢
夫我惟婦亦不至以人為夫故至于三歲而不孕為
其已在崇高嚴峻之位不難為夫而難為婦不難以
夫道率天下而難以婦道率天下又不患其不勝而
惟患其能勝終莫之勝有以自勝永无陵下之患故
吉

夫道專在乾故曰首出庶物然且曰不可為首婦道專在漸兩岐則有不復不育之患其曰利禦寇曰順相保是單以巽順明婦義其取象於隨陽鳥以此

家人利女貞漸女歸吉觀利女貞小畜婦貞厲外體皆巽九卦終于巽以行權天理于是為爛熟矣



歸妹人之終始倪氏女後魏涇州人許嫁彭生家貧常出谷汲水以養母生往犯之不從生曰汝終不為吾

婦耶女曰女道正終婦道正始禮未及成何得相辱
幽人多為超世絕俗之行以自高然曰幽人貞吉曰利
幽人之貞貞在幽即幽為明未嘗不吉且利也惟入
于幽谷為不可耳

歸妹卦義以下女歸上男何敝之有以少女歸長男終
之有敝不可勝言矣故夫子之翼歸妹直斷之曰君
子以永終知敝

易筌凡說而動皆不正之事以長男慕少女未有不為

禍者所謂征凶无攸利也

歸妹以須反歸以娣三初易位為恒象故曰以恒

愆期之志有待而行待是對待歸妹之四无與對待故
愆蹇初宜待亦為四連三不與初作對待之故



豐鄉射禮設豐燕禮有豐注豐形似豆而卑三禮圖云
罰爵作人形豐國名也坐酒亡國戴孟戒酒崔駰酒
箴豐侯沈酒荷甕負缶自戮于世圖形戒後李尤豐

侯銘豐侯醉亂乃象其形豐外體震謂象荷甕負缶
戒盈戒是亦得之

學者知雖旬无咎之義世上福只享三分便已當虞其
過

方言謂人多謂不照又多謂不濟常照與濟天下之能
事備矣

豐之有蔀與噬嗑之有膚腊肺肉同義

豐五來章有慶譽大動自大明而出安得无慶安得无

譽抱朴子騏驎追風不能近其迹鴻鵠奮翅不能卑
其飛黃河之激不能局其流雷霆之駭不能細其聲
豐其蔀日中見斗五无以來明動之章自為斗也罪在
君明動不合以為五用則君之為斗臣下實蒙蔽以
成之罪在臣

風雷益傳曰積風成雷雷電噬嗑雷電皆至豐埤雅曰
陰陽暴格分爭激射有火生焉其光為電其聲為雷
然月令二月雷乃發聲後五日始電則雷電固有不

合而章亦有不皆至者惟合而章乃成噬嗑惟皆至
乃成豐耳



旅老萊子曰人生于天地之間寄也吳語越王告吳王
曰民生于地上寓也古詩人生忽如寄

說而應乎乾為履柔得位得中而應乎乾為同人人无
此二應一步且必失足一人不可與處說而麗乎明
為睽止而麗乎明為旅人无此二麗无之而不張弧

載鬼无之而不瑣瑣取災

旅四得其資斧我心不快武王鋒銘忍之須臾乃全汝
軀刀銘刀利磴磴无為汝開

韓魏公明足以照人之奸未嘗形諸詞色四得其資斧
我心不快明觸物也上焚巢明極而為燥火也五射
雉惟柔中是用不用其明乃所以為明夫是之謂旅
貞耳

噬嗑上旅上鼎五皆目也噬曰滅耳鼎曰黃耳旅曰終

莫之聞可見坎為耳離亦為耳震為馬巽亦為馬艮
為虎兌亦為虎乾為龍坤亦為龍而陽以主陰陰唯
陽用之義俱可類見

噬嗑上何校滅耳曰聰不明旅上喪牛于易曰終莫之
聞或曰噬旅上九皆離離為牛牛有耳而无竅本以
鼻聽噬二滅鼻旅三焚次故噬上極于滅耳旅上終
莫之聞

旅上鳥焚其巢漢人釋之曰王者處民上如鳥之處巢

不顧恤百姓百姓畔而去之若鳥之自焚也雖先快
意悅笑其後必號咷而无及也百姓喪其君若牛亡
其毛也故稱凶意儘暢但謂牛亡其毛則蛇足耳

旅五射雉雉有力健鬪其羽文明一名華蟲旅卦象上
離下艮合而成旅以下言貴以止而麗上之明以上
言貴以得中之柔而順下之剛五有其明性或喜鬪
文止外華便非所謂以柔順剛射雉不有其明惟柔
惟中惟順之義一矢亡一日克復之義如是下止麗

以成明人可即以為次无之而不得所止者象矣故
曰終以譽命象故曰上建解二得黃矢坎中陽畫象
矢故云得旅五一矢亡離中虛故云亡皆實象



朱子言人只有一箇公私天下只有一箇邪正直拔判
決者震也巽有進退之疑故劈頭須武貞以治要終
貴資斧以斷

九陽剛是一畫進則進退則退无疑陰柔是二畫便有

兩端故巽初進退曰志疑又巽入也內也入而內安
忘危治忘亂存忘亡甚多故利武人之貞曰志治

二用史巫前巫後史謂用初而俾之麗于內為史用四
而俾之說于外為巫可四有離兌二雜聞史巫俱用
四可總皆剛巽得中之能事是以吉

崔仲鳧曰學莫善于巽莫不善于伐故增高者卑者也
內流者下者也萃律之形抔土不居滔涌之浸洎流
難入夫心易實而難虛氣易揚而難抑自視為有則

眇人如无自聰之極則聰言如醉又曰巽者伏也從明之謂伏成業墮于一矜素履敗于頃肆瞻物亢而賢者避言任雄而君子哂故有善不巽是奔善也得是義而巽之大旨了然矣

坤西南得朋具見母之能事統乎三女巽田獲三品亦見長女之能事兼乎中少

恒四田无禽巽初為主震四出而田襲之自外也巽四田獲三品四即初主人以為出原非外驚又不求盈

也

二用史巫史記事从又持中記事主於中者巫祝能齊
肅事神明者男陽有兩稱曰巫曰覡女陰不變直名
巫无覡稱禮王前巫而後史皆剛巽中正之義象故
明得中

巽入也入乎理順乎剛也欲入理先去欲欲順剛先克
柔故巽初利武貞曰志治巽四田獲三品曰有功陽
文陰武武貞陰无不正矣陽生陰殺三品俱獲殺无

不正功及生民矣

甲庚三日注甲主仁先後皆以寬令示之庚主義先後皆以嚴令示之

睽三元初有終睽不自三為初而合睽則須終之自三
巽五元初有終巽不自五為初而成巽則須終之自
五

蓋言甲艮反則震陽全之能事巽言庚巽反則兌陰半
之能事

先甲後甲貞而元冬而春晦而朔亥而子先庚後庚東
南而西苗而實花而果

巽入也而曰柔皆順乎剛離麗也而曰畜牝牛兌說也
而曰順天應人雖有入麗說之分而順義則一兌與
艮俱要終事兌五曰孚于剝可見與艮无異惟巽是
柔伏之體不有六日之庚无初是矣无終奚貴于巽
巽无初有終坤无成有終一義

巽四田而獲自内而外入有所入兌三來而凶自外而

內說非其說此所以相反



孚兌吉崔仲鳧曰待匪人之道孚而止矣

說以先民民忘其勞說以犯難民忘其死兩剛君上也
有以下民而惟民之視聽以為主使之說也勞之亦
說也生之說也殺之亦說也直使民至於忘勞忘死
此說道所以為大

巽柔兌柔同一柔也以巽四居於上下四剛之中曰悔

亡田獲三品以兌三居於上下四剛之中曰來兌凶
位之當不當所繫有如此

聖人繫兌之辭簡或曰兌為不言之說言貴簡也夫乾
始坤生始雖在乾而生實在坤坤之德行乃恒簡者
兌坤道所自始也咸之象曰天地感而萬物化生損
之傳曰天地絪縕萬物化醇男女構精萬物化生觀
此則知乾坤化生根柢尤在艮兌二少而兌尤首得
坤簡以為簡如枝幹托始惟一初萌果蓏從生惟一

方蕊嗣續由傳惟一少女方其為初萌為方蕊為少女固不待多為形容而亦豈必他有擬議乎觀兌上惟繫一引引之為言長也廷也導也大傳所謂引而伸之觸類而長之天下能事備矣便俱備此一引中又水胎於金兌者金行金之所成木之所胎引兌而曰未光以方引其端若光則既竟其施矣孟子言樂則生生則惡可已朱子言中心喜悅其進自不能已天地萬物造端托始生機全根抵一兌但為三來不

有上引便喚做剝剝爛也焦茅腐種也孚于剝皆生
芽活種矣君子小人之分一曰坦蕩蕩一曰長戚戚
戚戚一念兌之剝也坦坦一念兌初之和二五之孚
上之引也兌不尚言在心浹洽說體本簡繫辭亦簡
所從來矣

兌三來兌凶兌剛中而柔外三柔宜往外却來內是內
往之為耳故凶

乾自強坤載物坎常德行離照四方震恐懼修省巽申

命行事良思不出位兌朋友講習凡乾道皆全體之
立以自治為主凡坤道皆大用之行兼以治人為事
幹盡之幹與幹事之幹和兌之和與和義之和俱一脈
君子以朋友講習朱子跋胡文定與呂尚書帖曰朋友
之交責善所以盡吾誠取善所以益吾德非以相為
賜也各盡其道而无所苟焉則麗澤之益自有不能
已者讀此帖使人凜然起敬若嚴師畏友之在其左
右前後也嗚呼是數君子者其可謂盡朋友之道而

无所苟矣其卓然有以自立于當年而遺風餘烈可
傳于世者豈徒然哉按孚兌和兌或責善或取善皆
盡朋友之道而一无所苟者纔來與引便是苟魏莊
渠先生曰後世口說身不行却是把講字代習字
羊說羣之物君子如不以朋友講習于兌是一羊之不
若矣

孚于剥有厲與孚號有厲同義

凡坤定須承乾凡柔定須從剛凡陰定須順陽皆往道

无来理况兌以剛中柔外為德兌三不外而内外剛
内柔已非君子之道在說尤是諂媚諛佞一路

麗澤兌澤是聚水江湖河海是澤江湖河海之水无不
通流是麗一有不麗江自江湖自湖河自河海自海
不免都做斷流絕港死水去如人身血脉不通流便
都成病痛如何說

傳習是師弟事講習是朋友事總之師友俱朋友也當
得師來可稱傳當不得師來惟有講習是源頭落至

之水有不傳有不講任你聚得水多如那汪洋大澤也都要做死水去

夬履亨剝其正當同而操術異以履三志于和五兌三且欲入五履三之主說无兩而兌三之主說有偶故履五以夬為正兌五以亨為正也

介疾亨剝朱子曰人未說為善先須疾惡能疾惡然後能為善今人見不好事都只恁不管他民之秉彛好是懿德不知這秉彛之良心做那裏去也是可怪

兌聽商如離羣羊商兌離三不可合三不可故未寧
千門萬戶洞開在霹地一聲千紅萬紫發榮在說意一
點故震初言來而兌上言引中庸首言戒懼震之來
也論語首言學習兌之引也

隨五孚于嘉吉象曰位正中兌五孚于剥有厲象曰位
正當聖人贊易謹嚴嘗在一字間

乾坤主乎六子者也坎離之中又用乎四子之偏者也
故坎離自出頭面曰水洊至曰明兩作與天行地勢

同若雷風山澤則曰渚曰兼曰隨曰麗若有從來皆
非其自為之矣

渚雷兼山取中乎坎用坎之中而根乎離隨風麗澤取
中乎離用離之中而根乎坎



坎為險為加憂人之氣憂則結喜則散結如冰之凝沍
散如水之泮渙憂患渙散而亨通故曰渙亨又坎水
凝沍於下得巽風而流散為渙坎水流動於上得兌

澤而底定為節此俱俞氏琰說易首處

渙初用拯馬壯自己畧无窠座二奔机一滴散為萬點
无非天下憑倚之具三渙躬斯民也三代之所以直
道而行別無事於委屈俯僂

享帝立廟詎曰功德不敢忘即木本水源亦何敢忘是
以雖窮冬沍寒滴水皆冰而實无堅不泮无寒冰不
春水所以謂之渙也

萃與渙俱有假廟之象萃有求諸陰之義渙有求諸陽

之義朱子曰聖人教人子孫常常祭祀也是要去聚得他不教便散了又曰人死雖是魂魄各自飛散要之魄又較定須是招魂來復這魄要他相合所以安聚他魂魄不散便散推此萃之兌陰在坤上魄之較定者也渙之坎陽在巽下魂之常飛者也故順以求乎兌陰之魄為萃之假巽以求乎坎陽之魂為渙之假

存立廟之心九族只是一身矣存享帝之心宇宙民物

只是一身矣將置身于險得乎

澤水困水始涸始冰水澤腹堅風水渙便是東風解凍也

渙其躬渙有丘渙王居俱雜艮撰止之象若不謂徒作飄風之颺散而已又水歸山下為返源渙只作離散說三聖人无此

渙其躬不為坎險之躬而為艮止之躬无為風靡无為波流是以元悔隆山李氏曰夫人之所以膠執蔽固

終不能自脫於險者有我而已六三雖不中正而高出坎險之上於是釋然消散其有我之私而志在於外自然无悔矣

渙其血去逖出如所謂去盡風波止存水世間何事不能平是謂渙之極

范文正公淮上遇風詩一棹危于葉傍觀欲損神他年在平地无忽險中人渙其躬象曰志在外已在平地也

師王三錫命比王用三驅履履帝位而不疚泰帝乙歸妹大有公用亨于天子自天祐之豫殷薦之上帝隨王用亨于西山大畜何天之衢離王用出征家人王假有家益王用亨于帝吉萃王假有廟升王用亨于岐山井王明豐王假之渙王假有廟王居无咎程子曰詩書中凡有箇主宰底意思皆言帝有一箇包涵徧覆底意思則言天有一箇公共无私底意思則言王上下千百歲中若合符契

乾南坤北體之正離南坎北用之中凡言中正如姤五
井五以中正如需訟五豫晉二艮五直舉其體用合
一之德曰位正中如比五巽五隨五曰位在中如妹
五曰居位中如節五德既正中聖人之大寶曰位更
有貴于位矣曰位正當如履五否五兌五中孚五曰
正位如渙五俱以位言當言正而中正之德有不待
言也

王惟理曰蹇渙二卦易之善言朋也蹇之言連也先躬

之匪真見夫臣之耳目心思无一不當輸之王非匪
其躬則往者不來連何由集渙之言羣也先躬之渙
真見夫國之爵譽謀猷无一可執之于己非渙其躬
則羣者不散大何由成漢唐諸君子有大蹇必反之
思而莫得來連之助則其躬未匪也有宋君子當小
羣既渙之後而莫收有丘之益則其躬未渙也人臣
而以人事君也其可有己乎哉

同人之初出門南面嚮明直達天德之門隨初出門震

兌相函春秋出入日月運行之門節二不出門庭止
為秋冬閉塞之門去隨時之門殊遠象故曰失時極
君子以制數度議德行君子之德行於何而議總不出
於數度有制中世蓋未有淆其多寡之數踰其隆殺
之度而復有德行可議者



苦節不可貞苦節貞凶九節非出於心之所安與其心
之所甘未有久而不渝者也四安安於初之剛正之

說五甘甘於二之剛中之說節從剛陽中正心髓中
流出故安故甘而反是者无有不入於上之苦

一身之門戶在口故節初貴其不出一身之根基在足
故九卦首履而曰德之基魏莊渠先生曰此心若走
作耳目口體皆其透漏之路而口之透漏為多又曰
此心之放皆緣境而生纔舉念時便已著境暗處透
漏與明處透漏亦總一般



易筌儒者率以實訓誠獨中庸以天道為誠以不思不
勉為天道思勉不行浮華盡剝此虛之至也虛則誠
不虛則不誠觀中孚卦體尤為較著按中孚柔在內
而剛得中說而巽孚蓋以得中之剛孚在內兩柔為
孚初不內在內兩柔為虛體而名為中孚若以思勉
不行浮華盡剝為虛亦并失中庸之旨玩中庸得中
二字此豈如浮雲之馳空漚花之汎水電影之逐風
睡酣之幽夢之類哉毫釐千里之辨固在此聖學不

得大明亦在此是不可以不辨

金壘子中孚豚魚吉夫子傳之謂吉不在豚魚也人之
信能如豚魚則吉耳中孚十一月之卦豚魚生江海
其出有時率以冬至後應期而來信物也世解遂以
為人之孚信能感及豚魚故吉則違其本矣物之无
知獨豚魚耶且于中孚奚取

一說豚魚知風唐人詩江豚吹浪夜還風故舟人呼為
風信然則孚人者不如風之及豚魚孚于人者亦不

及豚魚之知風可乎

豚魚謂為兩物遍卦爻並無兩物堆垛一處為象者中
孚取象雖以中兩柔未易孚而從兩剛中為孚實則
孚以闇不以的孚以中不以外如初吉而上凶亦初
內而上外也士君子忽其居室而徵應于千里其皆
登天之翰音曾得為在陰之鳴鶴乎

乘木舟虛白居易感興只見火光燒潤屋不聞風浪覆
虛舟

鶴以感秋警露鳴鶴鳴燕去中孚之初二五之虞也故以不燕象寧象享虞四時在澤燕春來秋去此虞燕之別鳴鶴志閤翰音意的此初上之別

鳴鶴在陰韓文公雀鳴朝營食鳩鳴暮覓羣獨有知時鶴雖鳴不緣身啗蟬終不鳴有抱不列陳蛙黽鳴無謂閤閤祇亂人風土記鶴性警至八月白露降即高鳴相警移徙所宿處慮有變害白居易雞贈鶴一聲警露君能薄五德司晨我用多此即登天之喻

位不當履三臨三睽三歸妹彖中孚三皆兌之三爻與
來兌同萃四亦兌體否三豫三晉三皆坤噬嗑三大
壯五震三豐四小過四皆震而未濟之三則坎云
我有好爵困學紀聞鳳凰雄鳴曰節節雌鳴曰足足
即鳳凰飲器象爵亦取其鳴節節足足之義若鳥雀
之通為爵特鳥之淫者耳

翰音登于天貞凶牝雞之晨惟家之索亦此

中孚六三得敵或鼓或罷或泣或歌鼓罷風氣之作止

主四以孚三泣歌澤流之湍夷主三以孚四兩不相
下兩不相當故未孚而為敵惟敵乃成孚艮上下敵
應不相與應之宜敵者中孚得敵敵之宜得者

豚魚爾雅以為鯢一名嗔魚其出有時率以冬至後來
中孚十一月冬至之卦此魚應之而來是信之著或
以為即此物然不如江豚吹浪夜還風更似的大抵
魚類之來多有信如鯢以冬至至鯊以正月至次鯉
至次鰕至如三月桃花水至而鰕肥是鮪亦以三月

遡河上龍門鰲一名石首其來以春名春來至秋化
為冠鳧鰲與石首皆以三月八月出故江賦云鰲鰲
順時而往還又水經言海鰲穴居海底入穴則海溢
為潮出穴則潮退出入有節故潮水有期又鰲出則
潮下入則潮上其出入有節故鰲潮有期而江賦亦
云介鰲乘潮以出入

八卦成列並无低昂輕重只看時位如何有宜相摩者
有宜相盪者有宜相推者有宜相易者有宜相薄者

有宜相雜者有宜相攻者有宜相取者有宜相感者
有宜相得者孚三得敵則相攻之謂耳

卦言利涉大川者六需曰往有功同人曰乾行大畜曰
應乎天益曰木道乃行渙曰乘水有功中孚曰乘木
舟虛有問陳瑩中以當世之務者瑩中曰請以所乘
舟為喻偏重可行乎移左置右其偏一也明此則可
行矣



救小者之過惟有防過兩途救大者之過亦惟有藉涉兩法

小過六二得中進上過四遇五不為上逆退下不及三過二適為下順此所以无咎

小過用過乎儉古語奢者富不足儉者貧有餘奢者心常貧儉者心常富季元衡儉說貪饕以招辱不若儉而守廉干請以犯義不若儉而全節侵牟以聚仇不若儉而養福放肆以逐欲不若儉而安性

大過大者過也曰剛過而中小過小者過也曰柔得中

是以小事吉其所謂闕

如獨立遯世等事小成其小如過恭過哀過儉等事
初不是過剛過柔更不是過中故大過之後受之以
坎離之中小過之後受之以既未濟之中君子以天
下與世論須是大過以家與身論須是小過大過以
剛大有餘為用剛中之能事小過以柔小有餘為用
柔中之能事剛中又巽兌之柔之用柔中又震艮之

剛之用都不是過中之過又匪專以坎為剛中離為柔中故隨小大而皆亨

分陰分陽迭用剛柔用柔小事用剛大事柔而大事不得剛而小事不得小事宜柔大事宜剛小事而剛不可大事而柔不可



既濟六二婦喪其茀與家人六二无攸遂同義

小人勿用一繫於師上一繫于既三以行師之際或以

貪詐可使既濟之時或以小人易與又可化為君子
此而勿用見无時可用聖人之于用人其嚴如此

睽初喪馬勿逐震二喪貝勿逐既濟之二喪弗勿逐前
人詩分明一座上天梯手手扳援步步躋今日恍然
天上坐却嫌一向被梯迷又却嫌一向被梯迷不用
扳援不用躋自是從來天上坐何嘗間隔一毫絲此
睽初所以言自復而震既皆言七日得睽止轉却目
睛震亦去其目眚既則去疑去亂還其正明遂言得

耳

坎終係寘比終无首屯終泣血井終勿幕需終入穴節
終苦蹇終碩既終濡首俱陷義了手能事

泰二朋亡初如无遺三貞用永而惟五中是尚既二喪
弟後挽初輪前推三轂而惟五福是禋後世大臣知
此義者鮮矣

既二婦五之道盡付東西兩隣而不必其自己為東隣
離體而雜撰則為坎之中西隣坎體而雜撰則為離

之中東隣剛正位當而以柔克西隣柔正位當而以剛克是二人者皆從透底大中至正學問得來

易嚴小人勿用之戒惟是坎之乘剛上爻解獲狐射非為狐為隼皆此乘剛之小人勿用斷不為用其他小人或決之使行流或孚之使退消或外之使勿內遠之使勿近止之使為輿包之使為爪為魚畜之使為臣為妾便是處法

師上既三小人勿用陽剛方在陷陰柔又下石而乘之

茲其所以必為小人必亂邦惟師上柔正極順既三
剛正極明之君子能蚤辨而勿用默消亂於將來此
師上既三用人之功不後於師中之功而有加於伐
遠之功也

屯四求初以動五蹇四連三以濟五坎四納二以牖五
屯五非初无動蹇五非三无止坎五非二无平若井
四欲冽五泉在甃初泥節四欲劑五甘在安三嗟既
四欲禔五福在初二繻剛柔爻主之有辨固如此後

世近臣有知此義其於以人事君思過半矣

坎上爻處卦終應乾九三象三人來應艮九三象來厲
應巽九三象井收應離九三乃象濡首水上火下以
水克火恐終无以受人也其諸无剛爻為應如比无
首節苦坎係叢棘屯泣血易重剛德君子為應與无
如此

既濟即是患君子是以思而豫防未濟恒以方君子是
以慎辨而居

日沒不周西月出丹淵中陽精蔽不見陰光代為雄既
上濡首之厲亦此

小人勿用聖人繫之師上與既三師外順內險伏戈矛
於至順之中既下明上險肆很毒於強明之外天下
惟此二項為亂邦小人其餘皆所謂庸惡陋劣小人
至於泰否之分別君子小人如三箇陽明剛正之人
做一羣同心而共事即不純君子其為君子之道勿
問而知矣小人反是是為品隲人羣之大法

井汔至不勝內洄四十八之行數俱虛未汔濟不勝外
燔六十四之終事竟絕善學者於茲二汔尤宜亟省
履四愬愬終吉否四有命无咎睽四交孚无咎未濟四
貞吉悔亡皆曰志行履否健志得行睽未濟明志得
行升象南征吉曰志行巽東南坤西南合而南征明
在其中勿問之矣

易像鈔卷十二